

Gasteizek «konpromezuak» hartu nahi ditu soldatez eta enplegu banaketaz

Langabezia 1997an % 24,1era iristea aurrikusten du Erdi Eperako Plan Ekonomikoak

Eusko Jaurlaritzak ezinbestekotzat du errenta politikari eta enpleguaren banaketari buruz EAEko gizarte nahiz ekonomi eragileekin konpromezuak hartzea, «lanpostu gehiago sortu eta dagoen enplegua hobeto banatzeko». 1994-97 denboraldian ekonomi hazkunde motela eta langabeziaren igoera aurrikusten du Gasteizek.

J. AIARZA / DONOSTIA

Eusko Jaurlaritzak atzo onarturiko 1994-97 Erdi Eperako Plan Ekonomikoaren (EPE) ondorio azpimarragarriak dira horiek, gainontzeko helburu eta aurrikuspen makroekonomikoez gainera.

Errenta politikari buruz, Administrazioak soldata malgutzeko akordioak hartzea proposatzen du «ekonomiaren egoerari eta enpresa bakoitzaren egoerari egokituak», Euskal Autonomi Elkartean, herrialde historikotatik nahiz enpresetan sinatzen diren hitzarmenetan.

Enpleguari eutsi eta lanpostuak sortarazteko, berriz, lan kostuak murrizteko neurriez gain, dagoen enplegua banatzeko formulak hartzea aholkatzen du Gasteizek EEPEn.

Banaketa honetarako zenbait bide proposatzen du Gobernuak: lanpostuen mugikortasuna, lanaldia murriztea eta aldi baterako lana bultzatzea, besteak beste. «Neurri hauek gizarte eragileek negoziatu eta Administrazioak bultzatu behar ditu» zehazten du planak.

Helburu makroekonomikoei dagokienez, EEPEren estrategia zor publikoa eta kontsumo publikoa gutxitzean datza, defizit publikoa jaisteko. Aldi berean, Administrazio Publikoa erreformatu eta berorren inbertsio ahalgina mantendu egin nahi ditu Jaurlaritzak.



TXEMA FERNANDEZ/EFE

Finantza entitateek interesak jaitsi behar

Jose Luis Larrea Eusko Jaurlaritzako Ekonomia eta Hazienda sailburuak interes tasak gehiago jaitea eskatu zien atzo finantza entitateei, batez ere enpresentzako maileguetan. Jaitsiera honek, politika eta gizarte eragileek indarrean jarritako neurriekin batera, «krisitik irteteko susperketa prozesuari lagundu» egingo diola uste du Gasteizko sailburuak. Adierazpen hauek Gobernuaren azken zor publikoaren jaulkipen ekitaldian egin zituen Larreak. Euskabono jaulkipen berri hau 16.500 milioi pezetakoa da eta 18.500 milioira zabaldu daiteke. Larreak azpimarratu zuenez, bono hauek % 8,15eko interesa dute, duela urtebetekoek % 13koa zuten bitartean. Azken honen ostean Gobernuak 66.000 milioi pezetako zorra jaulki du aurtan.

Hemendik 1997ra ekonomi hazkunde apala espero du euskal Administrazioak, alegia % 1,1 datorren urtean eta tasa handiagoak ondokoetan, 1997an % 3,2ra iritsi arte.

Testuinguru honetan, Gasteizek lanpostu sorrera txikia aurrikusten du lau urte hauetan. Ondorioz, langabezia tasak gaur egungo % 23,9tik % 24,1era egingo du gora 1997an, EEPEk aurrikusi duenez.

«Langabezia tasa altu honen arrazoia biztanleria aktiboaren bilakaera da, denboraldi honetan hazi egingo baita. Horregatik, okupazioaren hobekuntzak ez du langabezia tasaren jaitsiera ekarriko» dio txostenak.

Sektoreen diagnostia eta estrategia ezberdinak

M.A. / BILBO

Ekonomi plangintzak sektore ezberdinen egoera aztertzen du eta bakoitzean jarraitu beharreko estrategiak proposatzen ditu. Horrela, industri politikari dagokionez helburu nagusien artean konpetitibitate maila hobetzea legoke, eta hori lortzeko berrikuntza, inbertsioa eta nazioartetzea jotzen ditu beharrezkotzat.

Konpetitibitatea hobetzeko Gasteizko Industria sailak bultzatu dituen cluster-etatik ateratako gomendioak sustatzea eta jadanik martxan dauden egitarauak garatzea proposatzen du planak.

Teknologi garapenerako, berriz, EAEko zentroen koordinazioa eta Politika Teknologikoarekin aurrera egitea dira jasotzen diren ekimenak. Produktzioaren kalitateari garrantzi berezia ematen dio egitasmoak eta berau areagotzeko sistemak hedatzea eta baliabideak bultzatzea ezinbestekotzat jotzen du.

Enpresa txiki eta ertainentzako finantza oinarria bultzatzeko neurriak, Diputazioek bideratu beharreko industriarako laguntza egitarauak, merkataritza arloan enpresen nazioartetzea eta dibertsifikaziorako, besteak beste, Garapen programa aprobetxatzea dira 1994-97 eperako planaren proposamenak.

Azpiegitura sektoreko politikaren helburu garrantzitsuenak errepide eta trenbide komunikabideak hobetzea, garraio publikoen eskaintza areagotzea, lan hidrauliko handiekin jarraitzea eta, etorkizunera begira berriz, arlo honetan izan daitezkeen eskari guztiak gauzatzen hastea lirateke.

Giza errekursoak trebatu eta heitzeko egungo sistema produktio beharretara egokitzea proposatzen du planak. Era berean, enpresetan trebakuntza arloa bultzatzearen beharra jasotzen du eta gai honetan erakunde ezberdinen arteko koordinazioa areagotzea ere aipatzen du helburu gisa.

LABURREAN

SUPER gasolina eta berunik gabekoa merkeago

Super gasolinaren eta berunik gabekoaren gehienezko prezioak bihurtik aurrera 80 zentimo merkeago izango dira, Madrilgo Industria Ministerioak astebeterako hartu duen erabakiaren arabera. Gasolina normalaren eta gasoilaren gehienezko salneurriek, 90 zentimo egingo dute behera. Super gasolinaren litroak 107,2 pezeta balioko du Espainiako gasolindegietan ●

HAMAZAZPI

enpresa Senegal, Bolikosta eta Saudi Arabia

Euskal Autonomi Elkarteko hamazapi enpresatarako ordezkariak Senegal, Bolikosta eta Saudi Arabian izango dira datorren astean eta estatu hauetako inportatzaile, banatzaile eta fabrikatzaileekin bilduko dira, merkataritza harremanak bultzatzeko. Bidaia hauek Merkataritza ganbarek eta Gasteizko Merkataritza Sailak antolatuta dituzte ●

ELA Madrilen hauteskunde legearen aurka

Espainiako Gizarte eta Ekonomia Kontseiluan (CES) ezeztatu bota eman zion ELAko ordezkariak Madrilgo Gobernuaren sindikatu hauteskundeetarako lege proposamenari. ELAren iritziz lege proposamenak ez du bermatzen «hauteskunde prozesuan indar guztientzako partaidetza baldintza berdina izatea». Sindikatuak EAEn 1990ean erabilitako hauteskunde sistemaren antzekoa erabiltzea proposatzen du ●

SEGURTASUN

pribatuan greba ia erabatekoa izan da

Segurtasun pribatuaren sektorean hitzarmenaren negoziaketan presio egiteko antolatutako grebak ia erabateko jarraipena izan zuen atzo EAEn. UGT, CCOO eta LSB sindikatuek deitu zuten protesta ekintzara Espainia osoan. Guztira 60.000 langile eta 630 enpresa biltzen ditu sektoreak ●

MARKOS

OKINDEGI TA GOZOTEGI ETXETAK

Ubarburu P. 4-5 Pabilioiak
27 Industrialdea Tel.: 45.09.66
MARTUTENE

Urdaburu Kalea, 2. B. Ijurko
Tel.: 52 95 98 LEZO

Ategorrieta Etorb., 33
Tel.: 27 48 48 DONOSTIA

